

呂祖仙師道德真經

呂祖仙師道德真經

天運初來。與人同得。此之謂道。與人同有。此之謂德。  
動靜有時。彷彿空虛。有身之始。愚聖無分。情慾所羈。  
多遭疾苦。力能超鼎。安免輪迴。智可全軍。焉能自全。  
功名香餌。人何爭吞。妄想如絲。徒勞何益。在在可悟。  
他心自迷。為昌為殃。皆所自肇。能動不久。能銳易折。  
守其真神。毋損毋尅。眾靈初成。先通至性。因無思慮。  
所以悠悠。人手最毒。遭之不留。他在宇宙。與人何尤。  
誰不愛生。視之獨輕。此在他物。或謂無關。人之一身。  
何甘自戕。身雖為累。實道之基。此基一失。復墜輪迴。  
清靜自如。不貪不痴。以心思身。以身思情。何以何沉。  
靜中一念。為善為兇。防禦功深。惡念自消。打空塵慾。  
守定清真。形如枯木。心若寒灰。總皆棄物。烏用躊躕。  
道非幽異。幽異非道。德不自知。自知非德。太上虛心。  
光明如月。普照無窮。究竟無物。有物即暗。如雲掩月。  
雲過月明。原無纖塵。草色花光。隱隱動人。花草無心。

人自爲動。心何不在。獨在萬慮。勉力驅除。若防寇然。  
電光易過。見者目眩。當今之人。亦復如斯。利味何飴。  
道味何淡。淡則常存。適意悅耳。如木之蠹。道妙無窮。  
如月在空。深澗細流。悠悠千古。野鶴孤松。神仙所契。  
性靜心潔。不近華靡。覺后易惑。况其未覺。既覺何惑。  
心慧機多。恃其聰明。好爲辯折。鋒舌所觸。造孽最深。  
守吾定默。凝吾真神。若愚若屈。功不易居。居之無益。  
還我本來。穆然無懷。鏡之對人。人自爲現。鏡本無心。  
妍醜畢現。完全不虧。有如圓月。究竟非久。一室相聚。  
終日必散。四大非無。百動從心。心能不動。四大亦空。  
曠然無礙。魔亦自遠。一著貪痴。萬魔已圍。此時欲破。  
恐已無期。勿謂偶過。正罪之基。所起一念。善惡自知。  
人何昧昧。謗道曰非。大道盡此。敬修奉持。(終)

此經乃

呂祖仙師度人真經之一。修德進道之真徑。切實奉持。證道可  
期。